

qual è partito da Costantinopoli e vien con sier Andrea Griti orator nostro, et è homo di gran condition, et è schiavo dil Signor, zoè zaus di janizari; et che fin do zorni dovea zonzar li a Ragusi, per quanto li à dito uno homo dil ditto orator nostro, vene li per terra da Constantinopoli (*ad*) aspetarlo. Et dia vegnir a Cataro per conzar le cosse di confini.

Da poi disnar, fo Pregadi et vene le infrascripte lettere.

*Di Faenza, di proveditori, date a dì 23, hore 2 di note.* Come, vedendo bisognar a la guardia di la piazza, etc. 300 provisionati, havendo de li domino Lazaro Grasso, l'anno deputato con 200 provisionati, e do altri contestabeli con 50 fanti l'uno, pur soto el ditto.

*Item,* hanno poste a le porte, *videlicet* a la porta dil Ponte page 12, a la porta dil Borgo 20, a la torre dil ponte 4, a la porta Montagnana 12, a la porta Ymolese 20, et a la porta Ravegnana 12.

*Item,* in castelo, dove è castelan posto zà più zorni sier Alvixe Diedo qu. sier Francesco dotor, hanno deputa' Jacomin di Val Trompia con fanti 60. *Item,* diman sier Nicolò Foscarini si parte e va a Brixegele e quelli castelli di Val di Lamon per veder quei lochi. *Item,* è zonti 100 fanti cremonesi; e avisano saria tempo levar tante zente d'arme di quel territorio, non volendo far altro, e distribuirle su quel di Ravena, Zervia et a Rimano. *Item,* a sier Domenego Malipiero proveditor, è a Zervia, cussi da lui richiesti, li hanno mandato 125 fanti soto Schiaveto dal Dedo, et 10 balestrieri a cavallo soto Zorzi Dipentor. *Item,* scriveno, che si non fusse stà la lettera ebene di non tuor altri lochi, hariano auti Tusignan e Oriol di Sacho perchè li oratori erano li per darsi; e in Ymola è stà gran remor et venivano oratori per darsi *etiam* a la Signoria nostra, *tamen* loro ubedirano; e li hanno risposto a ditti oratori zeneralmente etc.

*De li ditti, di 22.* Come, havendosi portato in queste pratiche domino Andrea Recuperato dotor benissimo, qual fo uno di 3 oratori veneno in campo, però lo ricomandano a la Signoria. E voria impetrar 3 vichariadi con nostri rectori; el qual fo zudexe di maleficio con sier Domenego Trivixan el cavalier a Padoa, et vicario a Verona con sier Bernardo Bembo dotor et cavalier; sichè lo ricomandano assai.

*Di sier Nicolò Balbi proveditor di Brixegele e capitano di Val di Lamon, date in Faenza, a dì 22.* Come, havendo mandato Dionisio di Naldo verso Ymola a veder etc., have ri-

sposta le cosse esser ben dispòste, e in la forteza sperava adatar il tutto. Et che a Ymola erano alcuni fanti fati a Lugo soto uno Seguraza d'Arzenta, andati li a Ymola a instantia di Guielmo Tempion, qual zonto li, subito Baptista Saxadelo cuxin di missier Zuan di Saxadelo, li fichò uno spedo in la testa e l'amazò. *Unde* esso proveditor disse tutto a li magnifici nostri proveditori, quali li diseno *in secretis* non si pol atender altre pratiche. Siche lui si parte e torna a Brixegele.

*Di Ravena, di rectori.* Come il conte di Pitiano è li; non sa si 'l dia andar a Faenza o starsi li etc. Et *etiam* in lettere di proveditori date a Faenza, è uno capitolo che 'l conte li ha scripto si 'l dia venir di longo o star li. Et per Colegio fo scripto a Ravena, lo facesseno restar esso conte de li, in altro per la Signoria nostra li sarà rescripto.

*Di Zuan Piero Stella secretario, date a Urbin, o per dir meglio a Cai, a dì 18, 19 et 21, tre lettere.* In materia di fanti. À solicitato la expedition di alcuni *ut patet in litteris*, con domino Federico di Campo Fregoso locotenente li etc., ma non vi è arme e pochi danari; li danno *solum* lire 4 per uno.

Et or per Colegio li fo scritto a ditto secretario, et fo mio aricordo, vedesse haver il loco e terra di Santo Archanzolo, come il duca de Urbin ne promise, et la rocha, ch'è in le soe mani; la qual cossa auta, debi venir a repariar.

*Di sier Vincenzo Valier castelan a Rimano, date a dì 23.* Come quel castello à la note garde 7, e sono fanti 28. In tempo di paxe basteria 40, et al presente 50; ma in tempo di guerra 200 fanti basta. *Item,* vi sono do bombardieri posti dapo che 'l ducha Valentino prese quel dominio. *Item,* la ditta rocha volze passa 300; à le fosse large passa 16 con aqua viva per tutto, e li muri che traversano le fosse, *tamen* l'aqua li pol esser tolta da do bande; à la scarpa atorno, atorno, alta passa 10. E ditta rocha à un gran difetto, che non pò bater per fianco da niuna banda; à otto cantoni che vanno in dentro e in fuora; e quel castelan spagnol vi era per Valentino, la reparate da la parte di la terra a la francese, basando le torre e li muri, ingrossando lo parapetto da zercha pie' 11, e con el corador zercha pie' 16, con bombardiere a la francese. Pol esser compido el terzo; a proseguir li altri do terzi li anderia una grandissima spesa, e questa cossa si potrà poi consejar col conte di Pitiano, capitano di le fantarie, e altri. *Item,* che il signor Carlo Malatesta li ha dimandato stara 50 formento, era li in rocha,